



Ilinniartitaaneq sorleq, assassornikkut atuagarsornikkullu Inuit Kulturitoqqarput pillugu ilinniartitsiviusinnaasutut piukkunnarnerullunilu ukkatarinnilluarnerusinnaanersoq pillugu Naalakkersuisut misissueqqullugit peqquneqarnissaannik inatsisartut aaliangiiffigisassaattut siunnersuut. Misissuermittaaq ersarissarneqassaaq ilinniareernerup kingorna, ingerlariaqqiffiusumik ilinniaqqinnissamut, suliffissaqarnikkullu periarfissat suusinnaaneri, nunanik allanik suleqateqarnikkut periarfissat, aningaasatigullu kingunerisinnaasai, iluaqutissat ajoqutissallu, kiisalu ilinniagaqarfimmut pioreersumut ilinniartissap inissinneqarsinnaaneranut periarfissanut tunngasut ilanngullugit misissorneqassallutik. Misissuinerup inerneru kingusinnerpaamik EM2021-mi Inatsisartunut agguanneqarsimassaaq.

(Inatsisartunut ilaasortaq Peter Olsen, Inuit Ataqtigiit)

(siullermeerneqarnera)

Inuusuttut 16-it 25-illu akornanni ukiullit sulilersut imaluunniit ilinniakkamik ingerlatsisut amerlisarneqarnissaat siunertaralugu immikkut iliuuseqarnissamut Naalakkersuisut 2026-ip tungaanut aningaasatigut allaffissornikkullu sinaakkutissanik ilaqartumik periusissiamik FM-mi 2021-mi saqqummeeqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Múte B. Egede, Inuit Ataqtigiit)

(siullermeerneqarnera)

Qanoq illoqarfinni nunaqarfinnilu suliffissaaleqiffiusuni qarasaasiakkut attaveqaatitigut assingusutigulluunniit inuusuttunut inersimasunullu misiligutitut pikkorissartitsinernik ilinniartitseqqinnernillu neqerooruteqarsinnaanermik pilersitsisoqarsinnaanera pillugu nassuiaammik kingusinnerpaamik FM2022-mi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Tillie Martinussen, Samarbejdsparitiet)

(siullermeerneqarnera)

Siunnersuuteqartunut Peter Olsen Inuit Ataqtigiinniit, Múte B. Egede Inuit Ataqtigiinniit aamma Tillie Martinussen Suleqatigiisitsinunngaanniit siunnersuutaannut qujavugut, taakku uku assigiisutigaat, ilinniartitaanermut suliffeqarnermullu misissuisitsinissanik, nassuiaasoqarnissaanik siumullu isigaluni iliuusissioornissamik piumasaqarmata.

Demokraatit nuannaarutigaaq, Inatsisartuni isumaqatigiisutiginerqarmat, ilinniartitaanerup qaffassarnissaanut annertuumik suliniuteqarnissaq. Nunatta siunissaanut pingaaruteqartorujussuuvoq, amerlanerit ilinniagaqarnissaat, ullumimiit annertunermik suliffiit nunaqavissunik inuttalernissaannut. Ullumikkummi imaappoq, sulianut amerlasoorpassuarnut atorfinitsitsinermi avataaniit sulisussanik aallertarnerput.



Demokraatit pingaartilluinnarlugu isumaqarput, eqqortumiit aallartiffeqartariaqartoq, taannalu tassaavoq Meeqqat Atuarfiat. Meeqqat Atuarfianni angusat qaffassartariaqarpagut, meeqqat atuarfiat inuusuttut ilinniaqqinnissaminnut toqqammavigilluinnarmassuk. Meeqqat atuarfiat pitsaasoq fagitigullu ingerlalluortoq aqqutigalugu, meerartagut inuusuttagullu ilinniaqqinnissaannut pitsaasumik periarfississagatsigit. Aatsaat taamaaliornikkut arriitsumik, isumannaatsumillu inissikkiartuaarsinnaagatta, avataanit sulisussanik ilinniarluarsimasunik aallertarnitta annikillissinnaanut. Inuit aamma partiit tamarmik kissaatigaat, meeqqatsinnut atuarfik pitsaanerpaq neqeroorutigissagipput. Maannakkut taamaalorsinnaangilagut, piviusut ajoraluurtumik imaammata, nunanit sanilliuttakkatsinnit, meerartagut fagitigut meeqqat atuarfianni pitsaannginnerusumik angusaqartinneqartarmata.

Tamanna tunngavigalugu Demokraatinit pingaartuuvoq naqissusissallugu, Meeqqat atuarfianni pissutsinik pitsanngorsaanissamik suliniutit allanit suliniutinit, pingaartinnerugatsigit, taamatullu isumaqarpugut tassani tunngavilerneqartarmata.

Taamatut oqareerluta, siunnersuutit taakku pingasut uani saqqummiunneqartut, paasisinnaalluarparput. Inatsisartunut ilaasortaq Peter Olsen (IA) isumaqatigaarput oqarmat, pingaartuuvoq Inuit kulturiannut kulturikkut oqaluttuarisaanikkullu qilerut piujuartillugulu inerisassagipput. Isumaqarpugut, misissussallugu pissanganartoq, inuit kulturiat qanoq ililluta ilinniartitaanermi atorsinnaaneripput. Uanilu ilinniaqqinnerinnaat eqqarsaatiginngilakka, aammali meeqqanit suli atualingitsuniit Meeqqat atuarfiannit. Pingaartuuvoq, meeqqatta ilinniassagaat, suminngaanneerlulik, aammalu siulitta ileqquliusaasa suna tunngavigineraat.

Inatsisartuni ilaasortamit Múte Egede (IA) siunnersuut taamatut aamma paasisinnaalluarparput. Isumaqarpunga, tamatta isumaqatigiissutigisinnaagipput, unammillernartorujussuusoq, inuusuttorpasuaqarmat, suli ilinnialersimangitsunik imaluunniit sulilersimangitsunik. Tassunga uparuaasariaqarpunga, unammillernartup taassuma aqqinniarnissaa Meeqqat atuarfianimmat. Meeqqat atuarfianni fagitigut qaffasissutsit pitsanngortissinnaagutsigit, maannakkorpiaq unammillernartoq pinaveersaartissagaluarparput – tassalu inuusuttorpasuit 16 aamma 25 ukiullit ilinniakkaminnik aallartitsisimangitsut sulilersimangitsulluunniit. Meeqqat atuarfianni suliniarneq annertunerusoq aningaasaliinerunerluunniit inuusuttunut, maannakkorpiaq ajornartorsiuqtip qeqqaniittunut iluaqtaavallaarunnangilaq, Demokraatillumi isumaqatigaat, eqimattanut taakkununga immikkut ittumik suliniartoqartariaqartoq. Ilinniartitaanermut llageeqarnermullu ataatsimiititaliami suliareqqinneqarnissaanut qilanaarpunga, neriutugalugu, ataatsimoortumik suliniarnissamut siunissamilu ataatsimoortumik ingerlanissatsinnut isumaqatigiissinnaassasugut, Ataatsimiititaliaq kajumissaarneqarpoq Naalakkersuisunik qanittumik suleqateqaqqullugu suliniutinut ingerlareersunut ilisimasanik sukumiinerusunik pissarsiniarnermut, marloqiusamik sulinissaq minnerpaaffissaaniitinnarlugu.

Inatsisartuni ilaasortamit Tillie Martinussen (Sulesam) siunnersuutit ukkatarivaa, suliffissaaleqisut, piffinni appasissumik suliassaqarfiusuni, misiliutaasumik suliffissaaleqisut piginnaanngorsarneqarsinnaanersut. Tamannalu ajornangippat internettikkut aammalu e-læring aqqutigalugu ingerlanneqassasoq. Siunnersuut paasisinnaalluarparput, suulli tamarmik ilimanarsisippaat, taakkununga suliniutaasoq ingerlareertoq, taamaattumillu misiliutaasumik ingerlatsinissap piviusunngortinnissaa pisariaqarpassigani. Demokraatilli



Kultureqarnermut, Ilinniartitaanermut Ilageeqarnermullu ataatsimiititaliap siunnersuummik qimerluuinissaa isumaqatigaat misissorlugu, maannakkorpiaq tassani qanoq inissisimasoqarnersoq.

Taamatut oqaaseqaateqarluta siunnersuutit pingasut tamaasa Kultureqarnermut, Ilinniartitaanermut Ilageeqarnermullu ataatsimiititaliamut suliareqqinneqarnissaat innersuussutigaaavut.